

## Jü Carta San Pablota Guosa Huëpo Jiojtekähui Corintiommehui

### *Teboteri*

<sup>1</sup> Ínapo, Pablo, Diosta eä pámani, Jesucristotau apóstol, áapo nee äbo bíttuak, jü hermano Timoteotamak, jume Cristota sualhuäpo nau anim buere joära Corintiempo jometaune jiojte, entok sime jume Cristota sualhuäpo nau anim buiära Acayapo jomemmaki.

<sup>2</sup> Yanti ehume entok Diosta tü eähui enchimmaktunake, jü Dios itom Átchay entok Señor Jesucristota bétana.

### *Pablota jiokot au inneähui*

<sup>3</sup> Jü Diospo tü eri Dios áchayta béchibo entok ä üusihua itom Señor Jesucristota béchibo, bueituk nak jiolihuäpo Achayri entok jíapsi yejtehuäpo Dios.

<sup>4</sup> Íri áapo jiokot anhuäpo itom jíapsi yechame, bueituk ínëli kétchi itapo huatemte ára jíapsi yechanake jachin jiokot bem anëpo junne jum itom jíapsi yechahuaka pámani, Diosta itom jíapsi yechakä Bénasi.

<sup>5</sup> Bueituk jachin jü Cristota béchibo jiokot anhuame yún itot ä ayuka Bénasi, anëli kétchi jü Cristota itom jíapsi yechähui juebenna.

<sup>6</sup> Të, itapo jìokot ito bichätek, jíapsi joahuakate jinëuna; entok itapo Áapörìk bétana jíapsi joahuätek, jinëuriata entok jíapsi jotehuamta enchim jìpunakë béchìbo, ìri jìokot anhuame imì yeu huéiye ìri jíba ajäria jü jìokot anhuaka itou ket hueme.

<sup>7</sup> Entok jü itom boobichäu enchim bétana huitti huéiye, bueìtuk jüniate itomak jìokot enchim anëhui, entok këtchi jum jíapsi jotehuäpo itomakem kaate.

<sup>8</sup> Hermanom, enchimte ä jüneria-ia juka buiära Ásiapo jìokot itou sìkamta; tüisi namuksi itou sika itom úttia béppa, íkai itou hue násukte kaa jíapsaka áma ito yeu katmachiley.

<sup>9</sup> Bueìtukte béja itom suabahuaite boobíchaihui, ìri ínëli itou sika itom úttiärat kaa itom enakë béchìbo, ál-la Diostachi, jü kókkolam ára jiabitetuame.

<sup>10</sup> Áapo itom áma yeu sakatuak, entok jíba áma itom yeu kattua, jum buere jinhua machiku kókkò huäpo. Entokte at boobíchaihui itom ä úhuanakë béchìbo juka kókkò huamta,

<sup>11</sup> inëlem ket emeë itom aniäteko oraciónim joakari ito béchìbo. Bueìtuk imëri juebénakam ket ito béchìbo Diostau buanäteko, juebénakam ket Diosta baisaunake juka Diosta tü eäu itom mabetakä béchìbo.

### *Jachiakasu Pablo kaa pueblo Corintiou siika*

<sup>12</sup> Bueìtuk ìri ajäria jü ujoyória itom bíchakähui, jü itom naa kujaktepo huatem täyhui itom jíapsipo tüisi huéiye, ìri kaa emo

buérialihuäpo ál-la huitti Dióstamak jíapsihuäpo. Kaa jume yoremem jita täyapo ál-la Diosta tü ehuäpo, inélite ániat ito bojória, entok chë junne enchimmaki.

<sup>13</sup> Bueitukte kaa huatek enchimneu jiojte, juka huatek enchim nooka násuk at jünéaka juka huatek nokaka enchim at jünéapo. Tene ä boobíchaihui ä chupëpo enchim at jüneenakëhui,

<sup>14</sup> bueituk huatek huämëm at jüneela, itom enchim ujoyariatukähui anëli këtchi ítapote ujoyoriapo enchim jipure, huäri taahuarit Señor Jesússta yepsäpo.

<sup>15</sup> Íkai huitti ehuamta jípurekane, bat enchimneu huebabarek, bueituk guosa huëpo Diosta tühua enchim jipunakë béchbo;

<sup>16</sup> Macedonia buiärau bíchaa huepatne enchimneu bat noitibare, chúkula entok, Macedonia bétana nottilataka, huetek júchine enchimneu yebijnake. Huanäi chúkula emëe nee böo toijnake Judea buiärau bícha.

<sup>17</sup> ¿Jáamakne íkai yáa báreka kaa tüisi ä yahuak kaa tüisi at suaka namuksi ino ä yáaka béchibo? ¿Entok ínëli jü ín yáa bareka eähui jáamak yorem ehuäpo huéiye, bueituk ínëli jü guosa ehuame inot ayunake jü inel jiayhuame “jehui” entok “ëe”?

<sup>18</sup> Të Dios huitti ehuamta attiak jü enchimneu itom nokaü entok, kaa “jehui” entok kaa “ëe”.

<sup>19</sup> Bueituk jü Diosta Ūusi, Jesucristo, enchim násuk ito bétana nokhuakame, ino bétana, Silvanota bétana, entok Timoteota bétana, kaa

“ëe” entok “jehui” ti jiaubahuäpo nok-ri; ál-la jehui ti jiaupo taahua, áapöríkuchi;

<sup>20</sup> bueituk jü síme Diosta itom mak-rokau, áapöríikut chuppe. Huari béchïbo, jü símek béppa ujjória Diostat bínna, entokte ínel jiaunake “Júnentunake” Cristo Jesústa huämi.

<sup>21</sup> Áapo juka huitti ehuamta itom makka Cristotamaki, entok juka Diosta bétana tékilta yáa íahuaka yeu puahuamta.

<sup>22</sup> Áapo itom seeyotuaka entok juka Espíritu Santota chúkula itom mabetnakëu ä lüturiatukähui jíápsipo itom ä makkak.

<sup>23</sup> Tene ketune kee jee Corintiou huéiye ínel bat ín eäka bénasi, Diosta bíchäpone ín jíápsipo huitti enchim tejhua; bueituk enchim ín jiokolë béchïbone; të kaa ä junëlituk, ín jíápsine ára nenka.

<sup>24</sup> Katte úttiapo ito bétuk enchim an-ia Cristota sualuäpo, ál-late enchim aniabareka aane, bueituk Diostat ehuäpo kutti jábueka; enchim al-lenakë béchïbo.

## 2

<sup>1</sup> Íaribéchïbo enchimmeu ín huëpo kanne júchi enchim siroktua báare.

<sup>2</sup> Bueituk ínapo enchim siroktuakätek, huanäisu, ¿jábese nee al-leetuanake jáni? Al-la emëe jíbba, jume ín siroktuakähui.

<sup>3</sup> Juäri béchïbone enchimmeu jïojtek, bueituk enchimeu yepsakätek kaa sirokhuamta bit béchïbo, huäme nee al-letua máchimmaki. Bueituk huittine enchimmet eiya juka ín al-leäu, emem símetaka ínomak ä attiak.

<sup>4</sup> Bueituk enchimmeu jiojtekä, tüisi jiokot eiyay entok jiápsipo kaa pappeakane yún opoakay; të kaa enchim sirok iaka, ál-la enchim jünenakë béchïbo jachin tüisi enchim ín nakëhui.

*Pablo kaa tüisi ayukamta jiokörek*

<sup>5</sup> Të jábe nee siroktuakame, kaa nee jíba siroktuala, ál-la sïmem enchim kétchi, kaa yún nokbáahuäpo, júnelne jiaahua, “kaa yún nokbáahuäpo”, kaa kuttílasi nok báreka.

<sup>6</sup> Ìri jabetat kutti nokhuakame enchim bétana hueeka, türi beja yúmalasi taahua.

<sup>7</sup> Én entok emëe ä bej-reka kat eaka, chë júnaksanem ä jíapsi yechaka ä jiokörïpo yúmala, bueituk kaa uttesi ä sirok múknakë béchïbo.

<sup>8</sup> Juári béchïbone eláka ínel enchimmeu jiaahua áapörïkem jünetua enchim ä nake bétana.

<sup>9</sup> Bueitukne ket iari béchïbo enchimmeu jiojtek, lutüriapo jípubareka sïmeku enchim sayhuakapo áman enchim anëhui.

<sup>10</sup> Én entok, juka jábeta enchim jioköreu, ínapo kétchi. Bueituk ínëli ket jita jiokörïmachiku, ínapone ket juka jiokorïhuamta jioköre, enchim béchïbone íkai johua, Cristota bíchäpo,

<sup>11</sup> juka Satanásta kaa itom kobanakë béchïbo; bueitukte tüisi jüneya ára yore ä jioptuähui.

*Pueblo Troaspo Pablota kaa yanti eähui*

<sup>12</sup> Buere joära Troaspo nee yepsako Cristota evangelio nok báreka, puertam étaפורim jípureka junne Señorta bétana.

<sup>13</sup> In espíritupone kaa yanti eiyay ín hermano Titota kaa ín teaka béchibo. Chúkula, sika huépatne simem tebotuasuka Macedonia buiärau bíchaane siika.

### *Cristopo yöhuame*

<sup>14</sup> Chëte Diosta baisáuhue, juka jíba yölataka itom hueriamta Cristo Jesúsopo entok itom huam ámani síme kätanate ä jüneriatebo, juka musäla jubäpo ä täyahuamta.

<sup>15</sup> Bueituk Diosta béchibo entok Cristota ára jita joäpo, emo jinéulammechi áa béchibo musäla juuba, të jume emo tärume béchibo.

<sup>16</sup> Lüturiapom kóikko jubba, kokköna béchibo; të huamey béchibo entok jü jíapsihuame jíapsi béchibo. Iäri béchibo entok, ¿jábese yúmalasi au jipure?

<sup>17</sup> Bueitukte kaa jume juebenam benna jume tomi yöhuäpo Diosta noki tekipanuame, katte huatem bénasi ä kujaktia, ál-late Diosta bétana jíápsipo kayta esolatata; Diosta bíchäpote Cristota bétana nooka.

## 3

### *Bemela nokta nau tütehuäpo ministrom*

<sup>1</sup> ¿Jachute júchi itom naatëpo ito bétana jíba buéresi tüsi noknake? ¿Ö të ä jipüpo yúmala huatem bénasi, cartata tülisi ito bétana nokamta enchim béchibo, ö enchim tüisi ito bétana noknakëhui?

<sup>2</sup> Emem itom cartam, itom jiápsipo jiojteri, inélite täyahua carta letrapo, entokte síme yoremem ä nooka.

<sup>3</sup> Cristota cartatakem täyahua, ito bétana jiojtetaka, kaa tintayi, ál-la Dios jiápsamta espirituvi; tē kaa teta tablapo, ál-la takahua tabla jiápsipo.

<sup>4</sup> Entokte huitti at ehuamta jípure Cristota huämi Diostau bíchaa.

<sup>5</sup> Katte itom jita täya béchibo áma yúmahuamta jípure, bueituk huam jita täyahuäpo itom ä attiakä bénasi ehuäpo, ál-la jü itom áma yümähui Diosta bétana huéiye.

<sup>6</sup> Áapo ínēli itom yauhuak, ministerio tekil áma yúmahuäpo, bemela nokta nau tütehuäpo, kaa letrampo, ál-la espíritupo; bueituk jü leyta letra yore súuhua, tē jü espíritu jíapsihuamta yore makka.

<sup>7</sup> Entok jü ministerio kókkohuame lettrammey tetapo jiojtehuak, uvyóriata jípurey, ä inélipo jume Israelita usiarim karam Moisésta pújbat bitchay, tösali machiriata ä jípurey béchibo, iri entok lütiseka hueiyey,

<sup>8</sup> ¿jatchu kaa chē símek béppa uvyóriata jípure jáni, jü Espíritu Santopo ministerio?

<sup>9</sup> Bueituk jü ministerio bette nokpo chupeme, símek béppa uvyóriata jípureyi, tē jachu kaa chē júne símek béppa uvyóriata jipunake jü ministerio lútula jíapsihuamta itom makame.

<sup>10</sup> Bueituk huäri símek béppa uvyóriata hueriaihui, imi huam ä bithuäpo kaa al-lébenna, bueituk chē júne símek béppa uvyori jü chúkula hueme.

<sup>11</sup> Bueituk jü lütinakeme ujjóriata hueriay, jü jíbapo béchibotunakeme chë junne.

<sup>12</sup> Én entok juka böbithuamta jípureka, kaytatte jachin eäka huithuitti nooka.

<sup>13</sup> Entok kaa Moisésta pújbat ahuä patpatiy bénasi, jume Israelita usiarim kaa ä bínnaکہ béchibo, juka humentä, kaitäpo tahuasemta.

<sup>14</sup> Të jü bem koba suahua námakaka taahuak, bueituk én tahuariu tajti, juka Moisejta ley nokta nokhuayo, jü puj pattiria bem jipurëu ámet óreka taahua, íkái entok Cristo kaitäpo ä tahuariak.

<sup>15</sup> Entok ketune éni iri tahuariu tajti, júka Moiséjta Ley nokhuayo, jü velo bem jíapsi béppa órek.

<sup>16</sup> Të Señortau bíchaa emo jíapsi kuaktiakätek, jü bem puj pattiriatam ukhuatuna.

<sup>17</sup> Bueituk áapo jü Señor Espíritu; entok jü Señorta Espíritu anëpo, síme guoytiari aayuk.

<sup>18</sup> Itapo simetaka iari béchibo, ito pujba étapolataka ä bícha, espejopo bénasi júka Señorta símek béppa ujjóriata, símek béppa ujjóriapote bemelasi johua, ä alëbenatuhuäpo, juka Señorta Espíritupo.

## 4

<sup>1</sup> Íaribéchibo itapo íkái ministeriota jípureka, nak jikolihuamta mabet-lataka katte kom eiya.

<sup>2</sup> Entok juka esotatë tiusi machik kaa jobare, kabetate baitattähuaka ito buériale, entokte juka Diosta nooki kaa täbuiasi huatem majtia,

ál-la juka lutüriapo täyahumta jíbba, simem bétana ito jüneriateboka Diosta bíchäpo.

<sup>3</sup> Jü itom evangelio éсотaka órek, entok jíba anéli órek jume emo tárulame béchïbo.

<sup>4</sup> Imechïri, jü diablo ániat au dios joame, jume Diosta kaa súaleme koba suahuäpo am puj pattiak, bueituk jü Cristota evangelio simek béppa ujyorika kaa am machirianakë béchïbo; áapo entok Diosta jíápsäpo tua alëbenna.

<sup>5</sup> Bueitukte kaa itapo ito nokriabareka nooka, ál-la Jesucristota Señorpo, ítapote entok enchimneu tekipanuaareom Bénasi, Jesússta itom nakë béchïbo.

<sup>6</sup> Bueituk Dios nesahuek, jum kaa machiku machiriata ayunakë béchïbo, áapo itom jíápsim machiriakame, bueituk ïri machiria lutüriapo at jünehumta täya béchïbo, juka Diosta bétana simek béppa ujyorik, Jesucristota pujbäpo.

### *Diostat ehuäpo jíapsihuame*

<sup>7</sup> Íkäi buere bejremtate jípure babu báasompo imey báasom entokte itapo, bueituk jü huéchiapo yúmalasi uttiära Diosta bétana huéiye të kaa ito bétana.

<sup>8</sup> Símekutte jiokot aane, tëte kaa kom eiya, námuksite ito bitcha, tëte kaa amay ito huiike.

<sup>9</sup> Jájjahuaka junne tëte kaa itapola aane, huattilatata junne tëte ketune jíápsa.

<sup>10</sup> Jíbate síme kätana takahuat ä huéria juka Jesússta mukukähui, bueituk kétchi juka Jesússta jíápsau itom takahuammet ä binná béchïbo.

<sup>11</sup> Bueituk itapo jiápsame, jíbate kóikko bareka ito toijla Jesústa béchibo, bueituk kétchi jü Jesústa jiapsäu itot bittunake itom takahua ára mukemtachi.

<sup>12</sup> Iaribéchibo jü kóikko huame itot aane, enchimmet entok jü jiápsihuame.

<sup>13</sup> Të Diostat ehuäpo Espíritu Santopo áabenak jípureka, ä: “Jiojteri bénasi anä sualek, huäri béchibone nooka”; ítapote ket ä sualek, iaribéchibote ket nookak.

<sup>14</sup> Jüneaka juka Señor Jesústa jiabitetuakame, itom ket Jesustamak jiabitetuanake, entok itom áamak yeu jäbuanake enchimmaki.

<sup>15</sup> Bueitukte íkái sîmeta joaka jiokot aane, enchim ito nakë béchibo, bueituk jü Diosta tühua juebénasi au bürurianake, entok ínëli jü Diosta tühua johuame juebenanake Diosta ay úttil béchibo.

<sup>16</sup> Júnentaka júnete kaa kom eiya, elaposu ïri itom béppa takahua lütiseka huéiye, të jü huaijhua itom takahua chikti táapo bemelasi tahuasime.

<sup>17</sup> Bueituk ïri chubala jiokot itom anëhui, itot ä johua juka jíbapo béchibo yúmalasi hueka béttesi sîmek béppa ujjorik.

<sup>18</sup> Juka bíthuäpo ayukamtate kaa bít báanake, të juka kaa bít-huamta ál-la; bueituk jü bíthuäka ayukame chubala jíbatunake, të jü kaa bithuäka ayukame jíbapo béchibotunake.

## 5

<sup>1</sup> Bueituk jüneate íkái itom takahua imi buíapo kaa bínnhuatunakemta juka karita én

itom áma anëpo ä mójakteko, Diosta bétanate jóata jípure, kaa mamamme yáata, téhuekapo jibäpo béchibo.

<sup>2</sup> Imi joakate ujbuana jio kot eäka, tehuekau joata itom jípureü yaij péaka;

<sup>3</sup> inélite supetuataka bittunake kaa jujünélaka.

<sup>4</sup> Bueituk ínëli këtchi, jume imi tákahuäpo chubala imi jíápsame, jio kot eäkate ujbuanna; kaa jujünélaka taahua péaka, ál-la nat béppa supetuataka, bueituk iri takahua én itom jípurehui jü bemelasi jíápsihuame kaitäpo ä nünake.

<sup>5</sup> Entok Dios íari béchibo itom yáakame, juka Espíritu Santota itom makkak ä lütüriatunakë béchibo juka itom ä mak-rokähui.

<sup>6</sup> Bueituk inélite jíba huitti eäka jíápsa, entok jünéaka imi takahuäpo itom aneu tajti, mekkate señortau aane,

<sup>7</sup> bueituk at eäkate imi naa kaate kaa pusimmea ä bíchaka.

<sup>8</sup> Tëte át eiya, itom takahua tösaka péaka, Señortamak an béchibo

<sup>9</sup> tëte inen ket ä jobáare, áamak aneka entok kaa áamak aneka junne, ä éä pamante aneka jíápsibare.

<sup>10</sup> Bueituk úttia itapo simetaka Cristota yäura bíchápo itom yeu jáptenakëhui, huehuëpulaka ä mabetnake juka bem yáakähui, takahuäpo aneka juka türik ö juka kaa türik.

*Tékil ministerio Diostamak au tütehuame*

<sup>11</sup> Jüneaka juka Señorta yörihuähui, yorememe Diosta bem mabetnakëu majtia, të

jü jáchin itom jíápsau Diostau maachi, entok íneline ket eiya. Enchimte ket itom täya machile.

<sup>12</sup> Juka türik ito bétana huentate kaa júchi enchimmak ettejoa, ál-late enchim ito bétana ä jipü-ia juka tü ehuamta, bueituk jume emo jabeleka kaa huitti eäka jíápsame emem ára am yommianake.

<sup>13</sup> Bueituk itapo rokomtukäteko Diosta béchibote rokom, të enchim béchibo suamsi ito nüye katte rorokom.

<sup>14</sup> Bueituk Cristota yore nákehui itom jíapsi yüe, ikäi eäka itom jüneriähui: huepuläka simem béchibo múkuk, të juäri béchibo simetakam kókkok.

<sup>15</sup> Cristo entok simem béchibo múkuk, bueituk jume jíápsame, bejam kaa bempo béchibo jíápsinake, ál-la hua mukuka jiabitekamta béchibo.

<sup>16</sup> Inentaka én bat bíchaa itom takaapo kabetate täya, Tëte itom huakajpo Cristota täyakätek junne, ente ínëli huamte kaa ä täya.

<sup>17</sup> Ínëli jabetaka junne Cristopo aneme, beméla úsiari, jü örataka jak ayukaihui amáu tahuak én entok sime bemelasi yáari.

<sup>18</sup> Én entok sime ïri Diosta bétana hueíye, áamak ito tütehuamta itom makkak Cristota huämi, entok Diostamak au tütehua tekilta itom makkak.

<sup>19</sup> Dios, Cristotat aaney jume ániat jíápsame áamak tütey, jume yoremem kaa türik bem yáalaü kaa ámet naïkiak, entok juka nokta áamak tütehuamta itom tekil makkak.

<sup>20</sup> Inélite Cristota téhuampo nesauta joaka naa rejte, bueituk Dios jume huatemmeu ujbuaname bénasi ito huämi, enchimmeute ujbuanna Cristota téhuampo: Dióstamakem emo tüte.

<sup>21</sup> Áapo kaa ä yauhuak juka kaa türik, të ito béchibo kaa türiku naikiahuak, bueituk itapo jum lútula jíapsihuäpo naikiahuak, áporikuchi.

## 6

<sup>1</sup> Íneli itapo, juka tékilta ámak joaka, kuttílasite enchimmeu nooka juka Diosta tühua kaa kia kaitäpo enchim mabetnakë béchibo.

<sup>2</sup> Bueituk ínel jiaahua: Aniata yanti tahualatukne enchi jikkajak; entok jü jinëuria taahuaritne enchi aniak. Ëni ajäria jü ára amä jehuiteterianakëhui; ëni ajäria jü jinëuria taahuari.

<sup>3</sup> Juka kaa türikte kaabeta itot bit ía ä jïopnakë béchibo, bueituk jü itom ministerio tekiltat kaa juënak at nok íaka.

<sup>4</sup> Al-late türik juaka ito bittebo jum símeku Diosta ministerio tékilta joaka, juebénasi yanti ito nüyeka, jiokot emo bit-huäpo, kayta jïpuhuäpo, entok jiokot eehuäpo.

<sup>5</sup> Yore bebiahuäpo, carcelimpo, juebena genteta chayë násuku, tekipanahuäpo, yetem jïpuhuäpo, entok ayunahuäpo.

<sup>6</sup> Chicha machik kaa jïpuhuäpo, yun jítat tüisi júnehuäpo, yore jiokolihuäpo, kaa bettek jíapsihuäpo, Espíritu Santopo, entok huitti emo nakhuäpo.

<sup>7</sup> Lútüria nokpo, Diosta úttiärapo, lutülay ára ái nassuahuäpo, batatana entok mikkotana.

<sup>8</sup> Úttilhuäka entok kaa tüisi ito bétana nokhuäpo emo úttilhuäpo, emo buérialihuäpo entok kaa emo buérialihuäpo; yore baïtattähuame bénasi të lutüriapo joaka.

<sup>9</sup> Kaa täyahuame bénaka, të tüisi täyahuaka; abe kókko me bénaka tëte ketune jíapsa, kókosi johuaka tëte kee kókko.

<sup>10</sup> Sirokamta bénaka, të jíba al-leaka, pobem bénaka tëte juebenam rikutela, kayta jipuremta bénaka tëte simeta jípure.

<sup>11</sup> Cristota súaleme Corintiopo joome enchimneu bíchaa itom teni au étapola; entok itom jíapsi bueürusi ayula.

<sup>12</sup> Itapote chikti itom jíapsimakte kayta yeu bëaka enchim nakkë, të emëe enchim jíapsipo itou bíchaa emoem ámpöle

<sup>13</sup> Bueïtuk nanancha ä innë béchïbo, itom ito nakëhui, usiaritau nonokhuä bénasine enchimneu nooka, emem ket emo jíapsi étapo.

### *Itapote Dios jíapsamta teöpo*

<sup>14</sup> Katem ámemak puaktia báare jume Diosta kaa yöremmaki, ¿bueïtuk jü kaa türik joame jachisu au jaläinake jü lútüriata joamtamaki? ¿Entok jachisu jü kaa machiriatamak áu türinake jü machiria?

<sup>15</sup> ¿Jachisu, Cristo diablotamak au türinake? ¿Entok jü Cristota súaleme jü kaa ä sualemamaki?

<sup>16</sup> ¿Jachisum nau türinake Jü Diosta teöpo, jume ídolommaki? Bueïtuk emëe Dios jíapsamta teöpöem, Diosta jiaka bénasi:

Ámemakne aneka ámemak naa huenake,  
entokne amebéchïbo Diostunake,  
bempo entok ín pueblotunake.

17 Īaribéchïbo ket júneli jiaahua jü Señor:

Ámenásukem yeu kaate, éntokem emo  
naïkimte;

éntokem jü jaiti machikut kaa mamma.

Huanaïne inapo enchim mabetnake

18 huanaïne enchim béchïbo achaytunake,

huanaï emëe ín üusimtunake, entok ín  
malamtunake,

tï jiaahua jü Señor sïmeku úttiakame.

## 7

1 Én entok emëe nakhuame, jukaï  
bobithuamta jípureka, takahuat entok espiritut  
chïcha machik itot ayukamta bétanate ito  
tüterianake, juka Diosta béchïbo jíba santosi  
jíapsihuatate yúmalasi jípunake, Diosta  
majhuëka ä yörïhuäpo.

*Pablota tüisi al-lëahui corintiom jíapsi kuaktekä  
béchïbo*

2 Tü ehüäpem itom mabeta: bueitukte kaa  
türik kaabetau yáala, kaabetate juënakü au  
nasontetuak, entokte kaabeta baïtaula.

3 Kanne bettek enchimneu nok báreka  
nooka; bueitukne bannataka béja enchim ä  
tejhuasula, ín jíapsipo enchim ín jípurëhui itom  
jíapsäpo entok itom nau kókköpo.

4 Kanne tihueka enchimneu huitti nooka.  
Entokne enchim bétana tüisi buere al-leiya,  
jíapsi yejtehuamtane yúmalasi jípureka, entokne

yúmalasi ä jípure juka al-lehuamta, jiotkot anhuäpo junne.

<sup>5</sup> Bueituk Macedonia buiaräu yajaka naateka, itom takahua kaa jimyoreriata jípurek, ál-late simeku jiotkot eetuasahuak, päkutana bétana nau nassuahuäpo entok huaijhua bétana entok majhuëka jiotkot aaney.

<sup>6</sup> Të Dios jume jiotkot eäka ä bétuk emo nüyeme jíapsi yechame, itom jíapsi yetchak Titota itou yepsako.

<sup>7</sup> Entok kaa itou ä yepsaka béchïbo jïbba, ál-la kétchi jum jíapsi yejtehuäpo enchim bétana ä jíapsi yechahuakapo, entok ket itom ä tejhuak juka tüisi nee nákeka ino béchïbo enchim buanähui. Huanäine iari béchïbo chë júne al-lëiak.

<sup>8</sup> Elaposune huäri cartai enchim siroktuak, të én kanne jachin eiya, bueituk júnaköi jiotkot jiaka junne, huäri carta chubala jíba enchim siroktuak,

<sup>9</sup> tëne én al-leíya, kaa enchim sirok tuahuaka béchïbo jïbba, ál-la, sirok huäpo enchim jíapsi kuakteka béchïbo; bueitukem Diosta bétana siroktuahuäk, ínëli, imi huäm kayta enchim tarunakë béchïbo.

<sup>10</sup> Bueituk jü Diosta bétana sirokuame, jíapsi kuaktihuamta yore makka, jinëuriata béchïbo, iari bétanate kara täbuiasi eiya, të jü ániapo kia sirokuame, kókkko huamta huéria.

<sup>11</sup> Bueituk ínëli Diosta enchim siroktuakäpo, jita tü eerita enchimmeu yauhuak, jachisem emo aniak jum kachin anmáchiku, enchim majhuë násukem yore nakhuamtem nee

makkak, entok juka enchim naïbukëhuem tüteka tüisi tahuariak, bueituk inëlem jum simeku chïcha machik kaa jïpureka taahuak.

<sup>12</sup> Bueituk ïri enchimmeu ïn jïojtekähui, kaa juka kaa türik yakamta bétana hueiye, entok juka kökosi yahuakamta bétana junne, ál-la, Diosta bíchäpo, ä jünerianä béchïbo, juka tü eerita ito béchïbo enchim jïpurëhui.

<sup>13</sup> Ìari béchïbote jíapsi joahuak jü enchim jíapsi yejteriayi.

Tëte chë júne al-leíya juka Titota al-lea béchïbo, bueituk ä espíritupo oúsi ehuamta enchim ä makaka béchïbo.

<sup>14</sup> Enchim bétanane ïno úttìsulataka kanne tiusi tahuala, bueituk sime ïaribétanate lütüriata nok-la, entok këtchi jü Titota bétana itom ito úttìlekäu lütüriataka taahuak.

<sup>15</sup> Áapo chë júne enchim nakkë, enchimmeu huateka jachin simetaka enchim ä nok jikkajakä béchïbo, entok jachin Diosta yörihuäpo emo yoaka enchim ä mabetakä béchïbo.

<sup>16</sup> Al-leane simeku enchimet huitti äaka.

## 8

### *Cristota súaleme béchïbo tomi nau toijhuame*

<sup>1</sup> Ìnëli këtchi hermanom, enchimtä tejhua juka Diosta tu eäu Cristota sualhuäpo nau anim makuakahui jum Macedonia buiärapo.

<sup>2</sup> Bueituk jïokot ámeu huë násuk junne, jü simek béppa bem al-leahui entok polobemtaka junne, rikosi jita jipuhüä bénasim kaa emo jïokorek.

<sup>3</sup> Bueituknä jüneriatebo, juka tomita Diostau bíchaa naikiata al-leaka úttiärata bem jípurëpo ámani, entok chë junne bem úttiära áma yumä béppa.

<sup>4</sup> Bempom juebénasi itou ä aahuak juka al-lehuamta Diosta bíchäpo jipurokaka, jume Cristota sualhuäpo aniabaahuäpo.

<sup>5</sup> Entok kaa itomä boobichä pámani, ál-lam Señorta mampo bat emo tojaka ofrendapo, chúkula entok itom aniahuäpo Diosta äa pámani.

<sup>6</sup> İari béchibote Titotau kuttílasi nookak, bueituk jachin bannataka ä naatekä pámani, ínëli kétchi enchim násuk ä chupa sahueka, juka Diosta tühua tékilta.

<sup>7</sup> İnëli kétchi, emëe simekuchem Diostat ehuaamta yún jípure, nokta nokhuäpo, jita täyahuäpo, entok simekuchem kaa bettek jiapseka ára jita johua, entok enchim itom nakepo, ikäi tomita Diostau bíchaa naikiata entok Diosta tü eäu yünem ä jípure.

<sup>8</sup> Kanne nesahuemta bénasi nooka, ál-la ä jïobila béchïbo, jume huatem ára jita joápámani, entok kétchi jü yore nakhuamta kayta esoka enchim jípurëhui.

<sup>9</sup> Emem béja ä täya, juka Diosta tühua itom Señor Jesucristota jípurëhui, bueituk itom ä nakë béchïbo poobetaka taahuak, rikotaka junne, bueituk emëe ä pooberayi rikotukäem.

<sup>10</sup> Entok iayirine consejota enchim makka, bueituk İri enchimmeu türi, jume bannataka naateka, kaa ä joaka jïbba, ál-la ket ä huatiaka, İebu huasuktiay naateka.

11 Én entok kětchi akem ä yáa báreka eíya, bueituk jachin lauti enchim ä huatiakä pámani, ínëlem ket ára ä chuppa ä yáabahuä pámani enchim áma yumäpo.

12 Të tua batchu jü ínel ehuäpo ayuka yabahuame, ára yáatu áma yúmahuä pámani, të kaa áma yúmahuäpo ëe.

13 Tëne kaa íkái nooka, huatem yún jita jipunakë béchïbo, enchim entok kaa kayta jipunakë béchïbo.

14 Ál-la imechï taahuarimmet jü naarekik jípubahuäpo, jü yún enchim jita jipurëpem bempörim ára ania, bueituk chúkula enchimneu jita bëyei bempom yún jita jípurëtek ára enchim ania, ínëli jü nanála ehume enchimmet ayunake.

15 Jiojterita jia bénasi: “Jü yún jita toboktiakame, kaa yún ä jipurek, të jü chë ilikkik toboktiakame, kaa chë ilikik jípurek.”

### *Tito entok jume ä jaläim*

16 Të Diostate baïshue Titota ä jiápsipo enchimneu tü ehuamta ä jípurekä béchïbo ket jíba ino bénasi.

17 Të lútüriapo nokta mabetak ä tutürek, bueituk tuïsi enchimneu bíchaa tü eäka, ínëli siika enchimneu bíchaa ínel ä eäpo.

18 Entokte senu hermanota áamak áman bíttuak, iari bétana jü tuïsi nokhuame síme Cristota sualuäpo nau animmet jikkaijtu.

19 Të kaa ïri jíbba, ál-la ket jume iglesiam bétana ä tekia makhuak itomak ä huenakë béchïbo enchimneu bíchaa itom katëpo, juka

itom nau tojakäu enchimieu hueriu béchïbo; të iri ministerio tekil itom joäu Señorta jíba úttil béchïbota johua, entok enchim tü eäu jüneriatebö béchïbo.

<sup>20</sup> Kaabetate kaa türük itot nok-ïa, juka juebenak nau tojhuakamtat itom tekipanuä bétana.

<sup>21</sup> Juka lútula huetate jobareka eíya, kaa Señorta bíchäpo jíbba, ál-la ket jume yoremem bíchäpo.

<sup>22</sup> Kette ámemak áman ä bíttuak juka itom hermano, juka tü ehuamta juebenak bétana ä jípureüte juebénasi ä bil-la, të én entok chë junne, jü tü ehuame at aika, enchimmet tuüsi huitti ä eä béchïbo.

<sup>23</sup> Të Titota bétana, ínapone ä jalaäk entok nee aniaka tekipanua enchim béchïbo, entok itom hermanom bétana, cartata bem hueriäpom Cristota sualuäpo nau anim bétanam aman bittuari Cristota looria béchïbo.

<sup>24</sup> Bempörimem jünetua, Cristota sualuäpo nau anim bíchäpo, juka enchim am nakëhui entok juka huitti enchimmet itom ito úttilëhui.

## 9

### *Jü tomi nau tojhuame hermanom béchïbo*

<sup>1</sup> Jume Cristota súaleme béchïbo nau tojhuamta tékil bétana, kanne éntok enchimieu jïojtenake türi bejja.

<sup>2</sup> Buéituk juka enchim tü eäune täya, ínëline enchim bétana tü eäka entok al-leaka Macedonia buiärapo anemieu nooka, buéituk jume Acaya buiärapo joomem iebo naateka

huechiampom emo jípure; ínëli jume huate enchim jünériakam ä innëak juka huatem aniabahuamta.

<sup>3</sup> Tëne jume hermanom enchimneu bittuala, bueituk jü enchim bétana tüisi huëpo itom jünereaü, kaa kia bejatunake; të ál-la ín jää bënasi, huechiapem emo jípunake.

<sup>4</sup> Jachinaik huate macedonom ínomak äbo sajakätek, enchim kaa huéchiapo anemem teunake, huanäite tiusi tahuanake, huitti ehuaamta enchimmet ito jípurë béchïbo, të jü tiusi máchira kaa ito béchïbo ál-la enchim béchïbotunake.

<sup>5</sup> Ínëli, úttiatak kuttílasi hermanommeu ín noknakëhui, enchimneu bat am kannakë béchïbo, entok bannatka juka huatem aniahuamta bétana enchim nokakaü, huéchiapo bat enchim emo jípunakëhui, bueituk kaa úttiapo námakak jiapseka enchim nahuä tojnakë béchïbo juka huatem ái enchim anianakëhui.

<sup>6</sup> Tëne ínen ket jiaahua: Jü kaa jaikik echákame, ket kaa jaikik toboktianake; të jü yún echákame, ket yún jichupata toboktianake.

<sup>7</sup> Hueëpulakam jíápsipo bem nenki báreka eäu nenkinake; të kaa ä beutireka, entok kaa úttiapo bënasi, bueituk Dios ä nakke juka al-leaka, Diostau tomita buisemta.

<sup>8</sup> Entok Dios úttiata jípure, enchimmet ä bürurianakë béchïbo juka Áapörik tühua, jum ínëli bithuäpo, jibem simeku yúmalasi jita jípunake entok kayta enchimneu binake jum tühuata johuäpo.

<sup>9</sup> Ä jïojteri bënasi:

Ä naïkimtek, póobem miïkak,  
jü lútula jita ä joáu, jíbapo béchïbo órek.

<sup>10</sup> Entok hua Dios báchiata et-baremta makame,  
entok juka jïbuamta paanim, ínëli yore  
miknake entok ä bürurianake juka ethuakamta,  
entok juka chupuka takamta bürurianake,  
lútula enchim jita joapo.

<sup>11</sup> Bueïtuk ínëlem sïmeku rikomtunake  
huanärem kaa emo ámpöleka yún huatem ára  
anianake, ïri itot ä johua juka Diosta  
baisaihuähui.

<sup>12</sup> Bueïtuk ïri ministerio tékkil johuame, kaa  
juka Cristota sualemmeu bëyemta jíba johua,  
ál-la ket áma juebenna jü Diosta baisáhueka  
itom anëhui.

<sup>13</sup> Bueïtuk íkai ministerio tékilta bíchakam  
Dioстам úttılınake, juka Cristota evangelio  
nesahui enchim joä tiaka, entok kaa emo  
ámpöleka enchim am aníaka béchïbo,  
bempörim entok sïmem.

<sup>14</sup> Ínëli këtchi juka oraciónta bempörim joäpo  
enchim béchïbo, enchimim nakke, juka Diosta  
tühua juebenak béppa enchimet ayukä  
béchïbo.

<sup>15</sup> ¡Diostate baisauhue, simek béppa yörisi  
machik itom ä makaka béchïbo!

## 10

### *Pablo nok naksua ä ministerio tekil béchïbo*

<sup>1</sup> Ínapo Pablo enchimmeune ujbuanna  
Cristota úttesi yore nake pámani, bueïtuk  
enchimmak anëtekne kaa jikat eäka tülisi

nonoka, të kaa enchimmak anëtek entokne kuttílasi enchimneu nonoka.

<sup>2</sup> Huittine enchim tejhua, enchimmak anëtekne kaa kuttílasi enchimneu nok báare, íkái kuttíla noktane huitti nok báreka eíya, jume kaa türík itom joä tiammehui.

<sup>3</sup> Lútüriapote takahuäpo aneka jíápsa, tète kaa juka takahuata huaatiaü johua.

<sup>4</sup> Bueítuk jum nassuahuäpo áí itom ito aniähui katím imí ániapo joome, ál-la Diosta uttiärapo hueiye, bueítuk juka buéresi úttiaka órekamta kaitäpo tahuaria béchïbo.

<sup>5</sup> Juka nokta huëpo Diosta bej-reka jikau au cháalata kom tatap béchïbo, huanäi juka sime éerita Cristota nesahui jobahuäpo ä hueriu béchïbo.

<sup>6</sup> Éntokte ínël jü kaa tüisi anhuamtat kutti nokbare, juka Diosta nesahui yúmalsi enchim joayo.

<sup>7</sup> Juka bithuamtem at suaka ä bitcha. Bueítuk jábe ä jiasipo Cristota au jípurë tíame, íkái ehuaamta ket jípunake, jachín jábe Cristotat áu anë tíame, bueítuk ítapote ket anëli Cristotat aane.

<sup>8</sup> Elaposune chë júne ino úttile, jum yäura úttiata ín jípurëpo, ikári jü Señor itom ä mak-la enchim áí itom yötutuanakë béchïbo, të kaa kaitäpo áí enchim itom bínnakë béchïbo, ïari béchïbo kaibune áí tiunake.

<sup>9</sup> Bueítuk kaa täbuiasi bittunake, ín jïojterimmea enchim majtuam tenasi.

<sup>10</sup> Bueítuk lútüriapo huate ínël jiaahua, jume cartam úttia entok kuttílasim nooka, të áapo

áma anëtek kaa kuttílasi nooka, ä nokaü entok kaa şualmatchi.

<sup>11</sup> Íkãine ä jüneria-ia juka nokakamta, jachin juka cartapo itom nokä bénasi, kaa áma aneka entok áma aneka junne, juka yáa baahuamtate yáanake.

<sup>12</sup> Bueituk katte huatem bénasi ito nübareka eíya, entokte kaa áme bénasi ito jikau chatcha báare; bueituk bempom bempolaka nau emo jujünakte, entokim nanancha emo bíchaka kaa sua eíya.

<sup>13</sup> Të itapo katte kia jájana ito úttíl báanake, ál-la juka jünakterita Diosta yechaläpo ámani, bueituk ínël enchimneu yaij béchibo.

<sup>14</sup> Katte chë béppa ito eria, kaa enchimneu yaijlamta bénasi, bueituk ítapote bat echimneu yájjak juka Cristota evangelio hueriaka.

<sup>15</sup> Katte täbuik tékilta johuäpo chë júne ito úttíl báare, ál-la juka Diostat eäka enchim yöotu pámani, enchim násukte úttílhuaka binná, juka jünakterita itom jípurë pámani.

<sup>16</sup> Éntokte sime kätana juka evangeliota huatemmeu nooka, enchim anëpo chë huannabo, kaa täbuik tekipanuälapo kikkimuka, kaa täbuik tekilpo ito úttíl báreka.

<sup>17</sup> Të jü au úttileme, Señorpo au úttílnake.

<sup>18</sup> Bueituk jü apola au jikau chatchame Dios kaybu ä úttílnake, të jü Diosta úttileü ál-la.

## 11

*Pablo entok jume apóstolim ára nokichim*

<sup>1</sup> Ili rokosi nee anëpem nee jiokorekäték türeíyey, ä ínëlituk jehuitëem.

<sup>2</sup> Bueitukne näibukeka, Diosta béchïbo enchim näibukke, bueitukne huépülak jíba enchim kunatua báare, bueitukne jamut bemeta bénasi Cristotau bíchaa enchim yeu jábua báare.

<sup>3</sup> Të jachin jü bakot ä arahuë páman Evata báitahuak, ínëli jü enchim innëau ára au nayote, jum enchim jíápsipo huitti eäka Cristota sáu enchim katëpo.

<sup>4</sup> Bueituk jábe itou yepsaka tábui Jesústa bétana itou nokáteko, jü enchim itom majtiakä béppa, entok kétchi eme juka espírituta enchim mabetakä béppa tábui espírituta mabetátek, entok tábui evangeliota enchim mabet-lä béppa, ä turiakä bénasem eäka ä jehuitaría.

<sup>5</sup> Bueituk kaitäpone ino chë ilitchile, huamei buere apóstolim náapo.

<sup>6</sup> Eläposune ín nokäpo, kaa tua tüisi huéchiapo nooka, jum jita täyahuäpo kaa junëli; bueituk símeku jum jita itom joápote enchim ä jüneriatuala.

<sup>7</sup> ¿Jachune kaa tüisi ayuk jáni símem bétuk ino tahuariaka, enchim éntok jikat tahuariaka, bueitukne Diosta evangelio enchimmeu nookak kayta enchimmeu aahuaka?

<sup>8</sup> Huate iglesiam kaa tómeke tahuala nee ania báreka, ímëri nechim bejtuala enchim nee majtianakë béchïbo.

<sup>9</sup> Jiokot eäka enchim násuk nee aneyo, kaabetaune jita áahuak, bueituk juka inou bëyemta, jume hermanom Macedoniapo

joomem nechim aniak, simekutne ino suayak, entokne simeku ino suayanake, kaabetau kayta jita au béchibo.

<sup>10</sup> Cristota lutüría inot anë béchibo, kaabe nee ä úkhuanake juka yúmalasi ín al-leähui jum Acaya buiärapo.

<sup>11</sup> ¿Jatchiaka? ¿Jachune kaa enchim nake, jäni? Dios jüneiya enchim ín nakëhui.

<sup>12</sup> Juka ín joaüne jíba naburujti jobare, bueituk jume jítat júne jiahuiteka Diostat emo tekipanuä tíame, katim emo ito benä tianake.

<sup>13</sup> Cristotahuim emo apóstolim tiaka, Diosta tekilpom tomi yö báreka, të ímëri katim Cristota apóstolim.

<sup>14</sup> Entok kara at guomtisi maachi, bueituk Satanás apöisu tua ángel machiriata Bénasi áu sasankotua.

<sup>15</sup> Bueituk ínel ä huëpo kara át jünnera eetu bueituk jume au tekipanuame kechim täbuiasi emo yáaka, lútüla emo tekipanuä tiabare; íkái tékilta bem joä pámani bette nooki ámet chupana.

### *Apóstol Pablota jìokot anëhui*

<sup>16</sup> Júchine ínel jiaahua: káabe rokota Bénasi nee jìpunake; të emëe jíba ínëli ino bétana eátek, rokota Bénasem nee mabeta, ili ino úttil béchibo.

<sup>17</sup> Juka ín nokähui, kanne Señorta eäpáman ä nooka, bueituk roko ehüápáman hueíye. Jü ín ino úttilëhui.

<sup>18</sup> Bueituk juebénakam huakajpo emo jábele, ínapone ket ino úttil báare.

19 Bueituk eme susuakame jume rokosí emo nüyemmakem ára emo huería, emëe suamsi emo nüyeme.

20 Bueituk jábeta úttiapo enchim tekipanuatuyo katem jijiale, entok jábeta enchimmey tüisi tahuayo, entok jábeta jita enchim: üuhuayo, entok jábeta au jikau chatchayo, entok jábeta jopemmet enchim chonayo, yantem eäka ä bitcha.

21 Inobéchibo tiusi maachi jiöbe jü ín nokähui, tete iäri bétana katte úttiata jípure.

Të jume huatem nokaka áma emo yumä teätek, ínapone ket áma yúma eläposu roko jehuey jü ín nokähui.

22 ¿Bempom hebreom? Ínapo kétchi, ¿israelitamme? Ínapo kétchi. ¿Abramta usiarimme? Ínapo kétchi.

23 ¿Cristotahuim ministrom? Ínapo chë junne (rokota bénasi nee nooka); bueituk tékilta johuäpo, ínapo chë júne tekipanuala; yore bebiahuäpo juebénasine bemmuchari chë áme béppa; carcelpo yore joahuäpo chë burusi; jinhua machiku abe yore suahuäpo juebénasine áma naa simla.

24 Judíom bétanane mamnisi ä mabet-la juka yore bebiahuamta, huépülak béchibo kaa cuarentasi.

25 Baysine jibebiammey betmuchari, sejtulne tetammea mamaasuri. Baysine barcota roptey áma hueiyey, senu tukaapo entok senu taapone bahue násuk ansula barcota roptëpo.

26 Böommet boojohuäpo juebénasi;

bathuempo jinhua machiku, lak-ronim násuku jinhua machiku, jum jinhua machiku jume judío naciompo inomak joomem násuk, entok kaa judíom násuk jinhua machiku, buere joära násuk jinhua machiku, ánia see paria násuk jinhua machiku, bahue násuk jinhua machiku, jume emo hermanom tiaka kaa huitti jiápsame násuk jinhua machiku.

<sup>27</sup> Lotteka tekipanuahüäpo, juebénasi kaa kothuäpo, juebénasi tebaureka, entok baímukhuäpo, juebénasi ayunahuäpo, joásuhuäpo entok kaa sankohuäpo.

<sup>28</sup> Ikäi sïmeta hue násuk, jü chikti táapo inou yeu matchume, sïme iglesiam bétanane obiseíya.

<sup>29</sup> ¿Bueítuk jábeta koköri huechek, ínapone ket koköri huehueche? Bueítuk jábeta jïoptuahuakne, kujti eäka kaa al-leaka tatahua.

<sup>30</sup> In ino úttilnakeu ä úttiatak, inone úttilnake, kaa ín úttiakäpo.

<sup>31</sup> Jü itom Señor Jesucristota Dios Atchay, jü yü-tütti al-lerita attiakame, jüneiya kaa ín kia nokähui.

<sup>32</sup> Bueítuk pueblo Damascopo nee aneyo, jü rey Aretastau gobernador jume damasenom buere joära suayay, nee buijtebo báreka.

<sup>33</sup> Të barda bentanapone buere kanajtapo huannäbo kom yéchuak, huanäine ínël ä mampo ino yeu huikkek.

## 12

*Huantiria takat innëhuame*

<sup>1</sup> Lutüriapo ino béchibo kaa türi ín ino jikau chatchähui, tëne juka ín bíchakähui entok juka Señorta inou yeu machiriakaü nokbare.

<sup>2</sup> Senu yoremthane Cristota sualhuäpo täya, bueituk catorce huasuktiriam hueíye tehuekapo Diosta jiápsäpo jikau nóitirihuak. Kanne jüneiya ä takahuäpo ö espíritupo; Dios jíba jüneiya.

<sup>3</sup> Entokne ä täya huakai yoremta, ä takahuäpo ö kaa ä takahuäpo, kanne jüneiya, Dios ál-la ä jünería.

<sup>4</sup> Tehueka paradisou ä nóitirihuakahui, ímíri nokta jikkajak të íri nooki entok kabemmeu ára noktu.

<sup>5</sup> Íri yoremta bétanane ino úttile, të ino bétana entok kaitäpone ino úttil báare, ál-la jum kaa ín úttiakäpo.

<sup>6</sup> Të ínapo ino úttil báarétek kaa kia béja eíyey jü ín nokähui, bueitukne lutüriapo nook eíyey, tëne ä tojja bueituk kaabeta täbuiasi ino bétana eenakë béchibo juka inot ä bichähui entok inot ä jikkajakähui.

<sup>7</sup> Bueituk juka buéresi inou yeu machirihuakamtay, kaa ino jabelnakë béchibo, ín takahuat huantiria huicha sósoria tenaka inou bittuari, Satanásta nesahui joame jopemmet nee chonamta bénasi.

<sup>8</sup> İari bétanane Señortau baysi ä aüsula nee ä úhua sahueka.

<sup>9</sup> Të äapo ínel inou jiaahuak: “In tühua emobéchibo yúmala; bueituk jü ín uttiära yúmalataka tatahua jum kaa úttiata ayukäpo.” İaribéchibone tü eehuäpo ino úttilnake, jum ín

kaa úttiakäpo Cristota uttiära inot tahuanakë béchïbo.

<sup>10</sup> Entok Cristota ín nakë béchïbo ál-leane jum ín kaa úttiakäpo, kaitäpo bit-huaka junne, simeta inou bëye násuku, kaa tüisi bit-huaka, entok Cristota béchïbo jiokot anhuäpo. Bueituk jum ín kaa úttiakäpone, chë úttiaka tatahua.

*Pablo obisi eiyay Cristota سوالھوآپو ناو انيم  
Corintiopo joomem béchïbo*

<sup>11</sup> Ino úttilekane kaa suakamta bénasi tatahua, të emëe úttiapem nee junëli ayutuak. Bueituk ínapone enchim bétana úttil ehuay; bueituk huámei buere apóstolim náapo kaitäpone yeu tatahua, eläposune kayta bejre.

<sup>12</sup> Síme juka apóstol señaltane enchim násuk yauhuak yanti ino nüyeka, juka Diosta ára jita joähui entok jume milagrom, tua jüneriahuak ín apóstoltukähui.

<sup>13</sup> Bueituk emëe jitäposem yeu tahuala jume huatem Cristota سوالھوآپو ناو انيم násuku, bueituk ínapone kayta enchimmeu áula enchim nee anianakë béchïbo, ¡íkai ín kaa ammáli ayuri, nechem at jiokore!

*Pablo am tejhua bajikun huëpo ámeu  
yebijrokaka*

<sup>14</sup> Bajikun huëpone enchimmeu huebáreka huéchiapo aane, bueitukne kaitäpo enchim muksi eetuanake enchimmeu jita aahuaka. Juka enchim jípurëune kaa jaria, të enchim ál-la, jume usiarim katim áchayhuarim béchïbo tomita nau toijnake, ál-la jume áchayhuarim bem üusim béchïbo.

<sup>15</sup> Ínapone tüisi al-leaka juka ín jipurëu toijnake jita ái jinnü béchïbo, entok eläposune ínapo áma ino lütia yore nakhuamta enchim jíapsim béchïbo huatiaka, eläposune ínëli enchim nákeka, ínapo chë júne kaa nakna.

<sup>16</sup> Të jü enchim kaa ín obisi eetuähui, jü kayta enchimneu ín ahuaü huitti jüneriahuaka jipuhüä, të huate nee buere machï tíiya jänitukne ín arahuëpo am báitähuaka jita am úkhuak.

<sup>17</sup> ¿Jachune enchim báitaula jum jabeta enchimneu ín bíttuakäpo?

<sup>18</sup> Juebénasine Titotau ínel jiaahuak, áman enchimneu ä hue sahueka entokne áamak senu hermanota áman bíttuak. ¿Jachu Tito enchim báitähuak jäni? ¿Jachute kaa huepul espíritupo nau eiya, entok huepul huaraktiriapo?

<sup>19</sup> Jámakem enchimneu itom ito jiokorë teíyey. Të kaa junëli; Diosta bíchäpo entok Cristota tehuampote nooka. Ìri síme emo nakhuäpo hueíye, enchim áma yötunakë béchïbo.

<sup>20</sup> Jámakne kaa enchim ín teubarë bénasi eäka sum eíya, entok jámak eme ket nee teunake të kaa enchim eä pámani. Bueítuk jámak enchim násuk ayuk jü enchim nau nok nassuähui, huatek attia jípupeehuame, juëna omtira, emo näikimtehuame, huatemet bettek nokhuame, juënaku au jabelhuame entok jájana emo nühuame.

<sup>21</sup> Entok enchimneu nee notteko, tiusi machikne Diosta bíchäpo innënake, entokne

jáamak ket buannake, jume juebenak kaa türik joaka kaa emo jíapsi kuaktiamë béchïbo entok jume chïcha machiku jiápsaka, jámutta kaa jubeka ámak jiápsame, entok kaa turik johuäpo jiápsaka junne.

## 13

### *Huitti am tejhuakahui entok teboteri ä luutëpo*

<sup>1</sup> Ëni bajikun hueíye jü enchimneu ín noitinakëhui. Juka enchim násuk kaa tüisi huëpo, guoyim o bajim bíchäpo simeta huitti tahuariatunake.

<sup>2</sup> Bannatakane ä noksula, én entokne júchi ínel jiaahua enchimmak anemta bénasi, én entokne kaa enchimmak aneka ámeu jïojte jume bannataka Diosta bejrim yáakammehui, entok síme jume huatemmehui, bueítuk júchi enchimneu yepsakátek kaabetane säbuilanake.

<sup>3</sup> Bueítukem ä jüneria báareka ä jaria, nee nokay Cristota inot anëhui, áapo entok enchim násuk kaabeta säbuila, ál-la enchimmet uttiata jípure.

<sup>4</sup> Eläposu kaa úttiakamta bénasi kúrusit poponhuak, Diosta utteara béchïbo jiápsa. Alébénasi ítapote ket kaa útiak, tète ámak jiápsa Diosta utteara itot anë béchïbo.

<sup>5</sup> Enchimechem nat suhua, jachem Diostat ehuäpo aane jáni; emoem jüneria enchim áma yumähui. ¿Ö katem emo täya, Jesucristota enchimmet anëhui, ö jamakem kaa áma yúmaka tatahua?

<sup>6</sup> Täte jüneiya enchim jüenakëhui, elapo júneriatunake itom ál-la ama yumähui.

<sup>7</sup> Entokte jíba Diostau enchim nok-ria, kaa türik kaa enchim yanake béchïbo; të íkái enchim joay katte itapo ito úttil-ïa. Ál-la enchim juka türik jonákë béchïbo, eläposute itapo kaa áma yumamta benna.

<sup>8</sup> Karate jita johua lütüriata bej-reka huentä, të lütüriata béchïbo ál-la.

<sup>9</sup> Al-lehuamtate jípure kaa itom uttiaka béchïbo, tëte enchim úttiata jipu-ïa, entokte ketune Diostau enchim nok-ria yúmalasi Diostamak enchim jíapsi-ïaka.

<sup>10</sup> İari béchïbone enchimmeu jïojte kaa enchimmak aneka, bueituk enchimmak anëtek kaa kuttalak nok béchïbo, juka yaura uttiata Señorta nee mak-la pámani, íkaine mak-ri ái yötu béchïbo, të kaabeta kaitäpo ái tahuaria béchïbo.

<sup>11</sup> Jum simeku hermanon, ál-leaëm, kayta áma bëyepem yúmalasi emo jipure, emoem jíapsi joiya, nanabeuchem eíya, éntokem yanti eäka jíapsa; huanäi jü Dios yanti ehuamta entok yore nakhuamta jípureme, enchimmak annake.

<sup>12</sup> Emóem tebotua Cristota sualhuäpo emo nakeka.

<sup>13</sup> Sime jume santosi jíápsame enchimim tebotua.

<sup>14</sup> Señor Jesucristota tü eäu, jü Diosta yore nakëhui, entok Espíritu Santota jíápsipo jipuhuame, enchimmaktunake. Júnentunake.

## **Mayo**

### **Mayo: Diosta nooki yorem nokpo New Testament**

copyright © 2014 Wycliffe Bible Translators, Inc.

Language: Mayo

Contributor: Wycliffe Bible Translators, Inc.

All rights reserved.

2025-05-13

---

PDF generated using Haiola and XeLaTeX on 11 Jun 2026 from source  
files dated 13 May 2025

84020f7b-8f34-5f65-803f-a2c6c92b92ea